



**Rede Defensor Direitos Umanus  
(RDDU)**

Rua Karketu Mota-ain Nù. 08, Farol, Dili Timor-Leste  
*No. Telefone: (+670) 77259858, 77372095*  
**E-mail: [joanicogomes58@gmail.com](mailto:joanicogomes58@gmail.com)**

---

**Komunikadu Imprensa  
9 Novembru 2018**

**Komemorasaun Masakre 12 Novembru ba dala XXVII: Rede Defensor Direitu  
Umanu husu justisa no akuntabilidade**

Loron 12 Novembru 2018 ita povu timorensen komemora loron heroi joventude ba dala-27. Komemorasaun ne'e hodi dignifika dedikasaun no sakrifisiu husi martires jovens sira ba luta libertasaun patria. Jovens barak mak terus husi tortura oin-oin, mate ka lakon forsadu hodi defende no reklama pasifikamente direitu povu timorensen ba auto-determinasaun.

To'o agora, jovens barak nian paradeiru familia sira seidak hatene, serake sira mate ona ka sei moris, to'o agora ofisialmente familia vitima seidak hatene. Tuir prespetiva direitu umanus, jovens sira ne'ebé lakon depois-de masakre kontinua nu'udar vitima-biar katak situasaun ka kontextu diferente ona. Katak biar Timor-Leste sai ona estado independente no la'os autor violasaun iha momentu akontesimentu ne'e (halakon vitima sira), maibe la signifika katak Estado Timor-Leste laiha responsabilidade ruma ba vitima sira. Ema sira sei lakon ne'e sidadaun Timorensen no heroi ba ezistencia Estado Timor-Leste. Nu'une, Governu Timor-Leste iha responsabilidade moral no politika ba vitima sira nian direitu. Familia vitima nian direitu atu ema sira lakon nian paradeiru, no sé karik ema sira lakon ne'e mate tiha ona, familia iha direitu atu halot mate-isin sira ne'e ho dignu tuir kultura ida-ida nian.

No tuir prespetiva moral-politika, Estado Timor-Leste iha obrigasaun atu hakasa'an buka-tuir paradeiru jovens martires sira ne'e. Esforsu ne'e nu'udar jestu ba respeitu no dignifikasaun ba ema sira ne'ebe sakrifika ba ezistencia Estado ne'e.

Tinan 16 ona Timor-Leste independente, maibe esforsu atu buka-tuir ema sira lakon em-jeral-no partikularmente jovens sira ne'ebé lakon iha masakre 12 Novembru 1991, ate agora seidak iha progresu signifikante. Rekomendasaun CAVR ne'ebé hato'o ba Estado iha tinan 2005, nune'e mos CVA (Comissão verdade e Amizade) iha tinan 2008 rekomenda katak Governu Timor-Leste ho Indonezia tenki servisu hamutuk hodi hari'i Komisaun Buka Ema Lakon. Maibe realidade hatudu katak tinan 10 -resin ona depois-de komisaun hirak ne'e hato'o rekomendasaun, ita la haree medidas konkreta no sériu ruma husi governu rua ne'e atu buka ema sira lakon ne'e.

Pur-kontrariu, aktividade exumasaun (kee mate-ruin) ne'e akontese ba durante ne'e, ami nota hanesan fali asuntu partikular organizasaun "Komite 12 Novembru", no la'os programa ofisiál governu. No ne'e triste tebes, tanba bele konsidera ita nian governu falta respeitu ba ema sira ne'ebe sakrifika ba nasaun ne'e.

Ne'e duni, iha biban ne'e, ami husi Rede Defensór Direitu Umanus, apela ba Estado ka orgaun kompetenti iha governu atu foti medidas sériu hodi buka tuir ema sira lakon ba libertasaun nasaun ne'e. Husu ba Ministériu Negosiu Estranjeiru no Ministériu Solidariedade Sosiál hamutuk ho Parlamentu Nasionál hodi halo polítika ida atu dudu implementasaun rekomendasaun husi CAVR no CVA ba harii Komisaun ne'ebé nu'udae Obrigasaun Estado Timor-Leste ne'e.

Membru RDDU:

1. Assosiasaun HAK
2. JSMP
3. ACbit
4. AJAR
5. AHDMTL
6. Belun
7. Fundasaun Mahein
8. CODIVA
9. CVR Net Working
10. Alfela

**Dili, 09 Nov 2018**

**Koordenador RDDU**

**Inocencio de Jesus Xavier**